



Gemeinsam Äntwert vum Här Minister fir sozial Sécherheet a vun der Gesondheetsministesch op d'parlamentaresch Fro n°7880 vum 12. Abrëll 2023 vum honorabelen Deputéierten Här Marc Spautz iwwer de Lypoedème

- Wéi vill Leit sinn hei zu Lëtzebuerg vu Lipödem betraff?

Eng Datebank mat "Lipödem-Patienten" gëtt et net. Deementspreechend ass et net méiglech eng genee Zuel ze ginn. Etudë weisen awer dat ongeféier 10% vun de Frae – de Lipödem trëtt an der grousser Majoritéit vun de Fäll bei Fraen op – vum Lipödem betraff sinn an de verschiddene Stufen.

- Wéi vill Patiente sinn an de leschte fënnf Joer hei zu Lëtzebuerg oder am Ausland dowéinst operéiert ginn?

Eenzeg fir déi Akten, déi vun der Krankeversécherung iwwerholl ginn, sinn Donnéeën verfügbar. Déi Interventiounen déi vum Assuré selwer iwwerholl ginn, kënnen net vun der CNS erfaasst ginn.

- Firwat iwwerhëlt d'CNS d'Käschte vun enger Liposuktioun eréischt ab dem 3.Stadium, dat obwuel Studie beleeën, datt eng Operatioun zu engem méiglechstfréien Zäitpunkt besser Resultater bréngt an esou de Betreffene vill Leed a Péng erspuert?

D'Krankeversécherung iwwerhëlt just d'Käschte vun den Akten, Servicer an d'Ausstattungen déi an der Nomenclature an an den Texter vun de Statute vun der Gesondheetskeess festgehale sinn.

Duerch den Avis vun der Cellule d'expertise médicale (CEM) vum 14. Mee 2020 als Äntwert op eng Saisine iwwer d'Ufro vun der Aféierung vun zwee Akten am Zesummenhang mat der Prise en Charge vun der chirurgescher Behandlung vum Lipödem an op ausféierlech Recommandatioun vum 23. November 2022, sinn déi existéierend Techniken an hir Notzung am Stade 3 beschriwwen. Et ass drop opmierksam ze maachen, dass Däitschland an d'Schwäiz d'Prise en Charge am selwechte Stadium virgesinn an dëst ouni Erweiderung zum aktuellen Zäitpunkt. A Frankräich an an der Belsch existéiert keng Prise en Charge vun der chirurgescher Behandlung (Ameli.fr 2020, CCAM 2020, INAMI 2020).

Et ass weiderhin ze präziséieren dat Lëtzebuerg praktesch dat éischt Land war, an dem dës Prise en Charge ab dem Stadium 3 agefouert gouf.

- Bei wéi vill Patienten huet d'CNS d'Käschte vun enger Operatioun hei zu Lëtzebuerg oder am Ausland iwwerholl?

De folgenden Tableau informéiert iwwer d'chirurgesch Interventiounen am Ausland vun de leschte 5 Joer bei deenen d'Krankeversécherung fir d'Prise en Charge opkomm ass

Joer	Unzuel vun Assuréen
2018	53
2019	60
2020	27
2021	24
2022	20



An deem Kontext ass awer ze betounen dass d'Resultater mussen mat enger gewësser Virsicht geholl gi, well déi international Klassifikatioun vun de Krankheeten (CIM-10 ou ICD-10 op englesch) vun der Weltgesundheitsorganisatioun kee spezifesche Code fir de Lipödem virgesäit.

- Wéi bewäert d'Regierung d'Fuerderung vun den Interesseverband „Lipödem Lëtzebuerg“, datt d'CNS d'Käschte vun enger Liposuktioun schonn an engem méi fréie Stadium iwwerhuele soll?

Bei enger Reunioun, déi de 19. Abrëll 2023 tëschent dem Ministère vun der sozialer Sécherheet an der Associatioun "Lipödem Lëtzebuerg" stattfonnt huet, gouf zeréckbehalen dat géif en Aarbechtsgrupp gegrennt gi fir ze analyséieren wéi een d'Prise en Charge am Kader vun enger Lipödem- oder Lymphödem-Erkrankung ka verbesseren. Dës betrëfft eng Rei Punkten ewéi Kompressiounskleeder.

Hei sollen och d'Erfahrungen aus de Pilotprojeten, déi aktuell a verschidde Länner lafen a natierlech déi rezentst medezinesch Erkenntnisser – de Lipödem ass nach net komplett erfuerscht – an déi Aarbechten afléissen.

- Wat fir aner Behandlungsmethoden iwwerhëlt d'CNS a wéi héich ass den Taux, deen d'CNS vun de Käschten iwwerhëlt?

Am Kader vun enger Lipödem- oder Lymphödem-Erkrankung rembourséiert d'CNS aktuell eng manuell Lymphdrainage vun engem oder vu méi Kierperdeeler (Codé ZK16 an ZK17 an der Nomenclature vun de Kinéën). Aktuell ginn déi Seancen zu 100% iwwerholl wann et direkt no enger Operatioun ass oder am Fall vun enger Pathologie lourde déi an der Annexe G vun de Statute vun der CNS virgesi sinn an zu 70% fir déi aner Traitementer. Dann iwwerhëlt d'CNS nach d'Käschte vun der Kompressiounstherapie. An deem Kader bezilt d'CNS aktuell 2 Puer Kompressiounskleeder pro Joer an dëst zu engem Taux vun 80%.

- Denkt d'Regierung drun, fir en Zentrum fir eng spezifesch Lipödem-Behandlung hei zu Lëtzebuerg opzebauen?

- o Wa jo, wéi kéint esou en Zentrum ausgesinn?

Aktuell ass net geplangt en dédiéierten Zentrum fir Lipödem ze Lëtzebuerg ze schafen. Dës Krankheet kann an den aktuelle besteende Strukture behandelt ginn. Et ass natierlech all Spidol iwwerlooss fir déi eng oder aner Pathologie (also och fir de Lipödem) eng speziell Kompetenz opzebauen, an eng deementspreechend Offer fir de Patient unzebidden.

Lëtzebuerg, den 16. Mee 2023

De Minister fir sozial Sécherheet

(s.) Claude Haagen